

Karikiriki mothapisabaloi

E ngotswe ke Robert Muponde | Ditshwantsho ka Elizabeth Sparg



Ho kile ha eba le mosadimoholo ya neng a dula a le mong ntlong e letswapong la leralla. Baloi ba ne ba dula ba mo etela bosiu bo bong le bo bong. Ba ne ba mo etela ba pepile hodima diphiri. Diphoko di ne di bonesa tsela ya baloi ka mahlo a tsona a maholo a kganyang.

Kamehla ba ne ba etsa lerata le tshabehang mme ba otlala lemating la hae ho fihlela mafube a hlaha. Diphiri di ne di tsheha bosiu bohle mme diphoko di ngwapa hodima marulelo a jwang a ntlo ya hae. Baloi ba ne ba hoeletsa: “Ke kgale re qetetse ho pepa mokokotlong wa mosadimoholo. Tswela ka ntle!”

Mosadimoholo a qalella ho lla mme a ipiletsa ho badimo ba habo hore ba mo sireletse. Baloi ba ne ba tshwara moketjana o moholo jareteng ya hae. Ba ne ba tabola bongata ba diaparo tsa bona mme ba tantsha setupung sa hae. Ba ne ba tsamaya hantle feela pele mafube a hlaha. E ne e le baloi ba hlaha, ba hlaha ruri!

Yaba ho ba le ntho e lomalomang monwana wa leoto la mosadimoholo.

E ne e le tadi, yona ela e neng e tlwaetse ho kena ka lesoba leboteng. Ka makgetlo a mangata, mosadimoholo o ne a lekile ho e jesa tjhefo empa e ne e sa shwe. Tweba e makatsang ruri!

A nanabela seeta sa hae empa pele a ka e otlala, tadi ya bua. “Mosadimoholo ya ratehang, ke tlilo o loma monwana wa leoto ka kgotso. Ka masiu a mangata, o ntse o sa robale. Jwale, o hloleha le ho ya sebetsa masimong a hao. O tla bolawa ke tlala ntle feela le ha nka o thusa. Mosadimoholo ya ratehang, ke na le mohopolo!”



Ka lebaka la hobane a ne a hlile a hloka thuso, a kopa tadi eo hore e hlalose.

“Ka letsatsi le leng ke ne ke itsamaela ka kena hara lehaha mme ka bona dikgato tse kgolo tseo e leng tsa Karikiriki, mmolai ya makatsang wa baloi,” ha rialo tadi.

A bolella mosadimoholo, “O lokela ho kena ka lehaheng bosiu, o le mong o sa rwala dieta, o hoeletse lebitso la Karikiriki ka makgetlo a mararo, mme o tantshe o ntse o etswa.”



Yaba mosadimoholo o etela lehaha leo mme a etsa hantle seo tadi e se buileng. A hoeletsa, “Karikiriki! Karikiriki! Karikiriki!”

Eitse ha a tloha moo, a utlwa modumo wa dikgato tsa maoto a tsamayang ka mora hae. A qalella ho matha. Maoto ao le ona a matha. Yare ha a hetla, mosadimoholo a bona maoto a mabedi a maholo a mo setse morao!

Maoto a maholo a emisa ka ntle ho ntlo ya hae moo tadi e neng e mo emetse teng. “Maoto feela? Ke yena Karikiriki,” tadi ya hlalosa.

Bosiu ba fihla. Baloi ba hoeletsa: “Ke kgale re qetetse ho pepa mokokotlong wa mosadimoholo!” Ba qala ho kokota ka matla le mating la hae.

Hanghang, Karikiriki a tswa a matha moo a neng a ipatile lefifing. Karikiriki a raha dihlooho tsa baloi mme ba wela fatshe ba akgehile.

“O se ke wa ba bolaya hona jwale!” ha hoeletsa mosadimoholo. O ne a batla hore baloi bao ebe makgoba a hae masimong kaha e ne e le ka lebaka la bona lehola le neng le kgama dijalo tsa hae jwale. “Empa ha ba hana o ba bolaye,” a laela jwalo.

Baloi ba neng ba tshwerwe ba dumela ho ya sebetsa masimong. Ba ne ba tla etsa jwang? Empa bosiu feela.

Motsheare o ne o sa ba lokela; e ne e le nako eo ba robalang ka yona. Hape, ba ne ba ena le mokgwa oo wa bona wa ho hlobola diaparo, kahoo bosiu bo ne bo loketse bohle.

Mosadimoholo o ne a thabile. “Tadi,” a rialo, “kaha o pholositse bophelo ba ka, nkeke ka hlola ke leka ho o jesa tjhefo. Ha dijalo di kotutswe, o tla fumana mokotla wa poone hore o je.”

Tadi a tsetsela ke thabo. “Ke tla nne ke tla ho tla lomaloma monwana wa leoto la hao ha ke o hopotse feela, mosadimoholo ya ratehang!”

Maoto a Karikiriki a tantsha ka thabo. Baloi ba sa thabang ba phamola disekele mme Karikiriki a etella sehlopha seo se tlerolang ho ya masimong a malelele. Mme diphiri le diphoko tse swabileng? Tsa kgutlela morung moo e leng habo tsona.



Karikiriki mothapisabalo

E ngotswe ke Robert Muponde • Ditshwantsho ka Elizabeth Sparg

Mehopolo eo le ka buang ka yona

Na o nahana hore kotlo ya moloi e ne e na le toka? Hobaneng o nahana jwalo/ hobaneng o sa nahane jwalo?

Maikutlo a hao ke afe mabapi le ditshwantsho tse sebedisitsweng ke sengodi?

O nahana hore mohale wa pale ee ke mang? Ke hobaneng o kgethile sebakadi see?



Setshwantsho

Ke karolo efe ya pale eo o fumanang e tshosa ka ho fetisisa? Ngola mongolo ona bohareng ba pampiri e kgolo. Toroya ditshwantsho ho potoloha mongolo tse o hlahosang.



Ho bala

Ke dipale dife tse ding tseo o di badileng tse buang ka baloi, dikgodumodumo, diphiri le/kapa diphoko? O ka fumana dipale tse ding tsa Nalibali mona:

www.nalibali.org.story-resources. Kgetha pale e ntjha eo o tla e bala. Ke ka ditsela dife pale ee e tshwanang le ho fapana le *Karikiriki mothapisabalo*?




Ho ngola

Ngola tekodiso ya pale. Kenyeletsa kakaretso e kgutshwane mme o bolele hore ke hobaneng o neng o tla kapa o sa tlo e kgothaletsa bakeng sa babadi ba bang ba dithaka tsa hao le ba banyane ho wena.



Mosebetsi wa matsoho

Sebedisa dipoleiti kapa khateboto, pente le kgwele ho etsa dimaske bakeng sa dibapadi tsa paleng.



Tshebetso

Bapala pale ka ho sebedisa dimaske tseo o di entseng.

